

Delegat Dragutin Rodić postavio je pitanje Vijeću ministara BiH koje glasi:

„Kao što znamo, na poziv Stefana Fülea, komesara za proširenje i evropsku politiku, predstavnici izvršne vlasti i vodećih političkih stranaka u Bosni i Hercegovini prisustvovali su otvaranju dijaloga na visokom nivou o procesu pristupanja EU koji je 27.6.2012. održan u Briselu. Na tom skupu Evropska komisija je još jednom naglasila da Bosna i Hercegovina ima jasnu evropsku perspektivu. U tom pogledu svi učesnici usaglasili su Mapu puta koja bi mogla omogućiti, ako se blagovremeno i uspješno provede, da zemlja podnese vjerodostojan zahtjev za članstvo u EU prije kraja 2012. godine.

Jedan od navažnijih segmenata usaglašene Mape puta jeste da stavovi koji se iznose u institucijama EU odražavaju dogovor sa svim nadležnim institucijama i organima vlasti u BiH kao rezultat djelotvorne koordinacije. Iz tog razloga bilo je potrebno uspostaviti funkcionalan sistem koordinacije. Evropska komisija je u Izvještaju o napretku iz 2012. godine konstatirala da je nedostatak koordinacije postala glavna prepreka za BiH napretku i procesu integracija u EU. Tempo reformi nije ravnomjeran, država nije u stanju da nastupa jednoglasno, a EU se suočava s problemima u nastojanjima da se pruži pomoć BiH. Vijeće ministara BiH je, 16.10.2012., imenovalo tim za izradu dokumenata koordinacionog mehanizma u procesu evropskih integracija.

U kojoj je fazi izrada dokumenata koordinacionog mehanizma i šta predstavlja najveću prepreku da se uspostavi koordinacioni sistem na nivou BiH?“